

MALONGI YA TATA PISEKOPO NA KITANU YA SANTU

Bampangi batondama, bana ya Nzambi,

Konso mvula, dibundu ke pesa beto ntangu ya kuyindula ye ya kulanda mbote mbote maswekamu ya lugulusu na beto na lufwa ti lufutumuku ya mfumu na beto Yezu-Kristu. Na mposo yai ya santu ya mvimba, beto me ndima na kutala Kristu ye na kulanda mbandu ya yandi me bikila beto. Ye bubu, na Kitanu ya Santu, beto ke zola kusungimina kilumbu yina ya Kristu me katula beto na kimpika ya masumu na ngolo ya menga na yandi ya santu, mutindu yandi me kangudila beto nzila ya zulu na lufwa na yandi ya mpasi na kulunsi. Bonso Kristu ke nunga mbeni satana na kulunsi, beto fwete kusosa mpi na kubakisa mbote mbote diswekamu yai ya kulunsi na luzingu na beto bakristu; kuzaba mbote nde kulunsi fwete vanda sambu na beto nzila ya lugulusu, ata nde dilongi ya kulunsi ke pesaka lenda kumonika, bonso vandaka kulonga Santu Polo ye bonso mono yibukisaka beno yo na lumingu ya ndala, buzoba na meso ya bayina ke kwenda na lufwa. Ya kieleka, yo kele ngolo ya Nzambi mutindu yo me sonama na mikanda ya santu nde: Mono ta fwa kimbaku ya bambaku; mono ta sukisa ngangu ya bantu ya mayele (Cf. 1 Co 1, 18-19).

Kana Mfumu ya ntoto me ndima na kukuma mpika na zulu ya kulunsi, kidimbu kibeni ya nsoni kansi ya ke sala diswekamu ya Kalvari, kele sambu na kusonga beto yonso mpi nde beto fwete ndima nzila ya kulunsi ti kikesa yonso na mambu yonso ya mpasi ya lenda kubwila beto sambu na lukwikilu na beto na Kristu to sambu na kimbeni ya bantu lenda kubakila beto na kumona mabundu ya kieleka ya luzingu na beto. Kana Kristu ya ikele nti ya mubisu me mona mpasi ya kuluta kiteso, beto bayai, banti ya kukauka, inki kulenda kukumila beto ve? Beto vanda na kikesa na ntwala ya mambu yonso ya mpasi ya lenda simba beto. Beto tina luzingu ya kukonda mpasi sambu yo lenda nata beto ve na nzila ya lugulusu. Beto kusosa ve banzila ya nkaka ya lugulusu: bankisi to magie. Mukristu fwete bakisa nde lugulusu na yandi ke basika na kulunsi ya Mfumu na beto Yezu-Kristu. Mutindu

yina, kulunsi ikele diaka ve kidimbu ya nsoni, kansi kidimbu ya kivuvu ya mukristu. Bonso bana ya Israël ya vandaka kutala nioka ya kimbende ya Moïse kusalaka na kutambula lugulusu na meno ya banioka, mukristu fwete zaba nde ikele na kulunsi ya Kristu ya yandi me guluka na kimpika yonso ya masumu. Kulwata kulunsi na ntulu to kutula yo na kati ya nzo kulenda diaka ve kuvanda kidimbu ya kukonda mfunu kansi ya ke yibukisa beto nde, bonso mfumu na beto, beto ke ndima na kusadila Nzambi ti bampangi na beto na nzila ya mambote ye ya masonga ata nde yo kulenda kunata beto na lufwa. Ikele sambu na mukristu mpila ya kundima luzingu ya kimartyr ti kikesa yonso, sambu yandi me bakisa nde kulunsi ikele nzila ya ke nata beto na luzingu ya kukonda nsuka, na lunungu, nzila kibeni ya Kristu , Mfumu ye longi na beto imene kubaka. Beto lenda kuwa nsoni ve na kuvumina kulunsi. Yo ikele biteke ve. Ya ikele biteke ikele masumu na nge, mambu yambi ya nge kele kusala to kusosa na kukangama ngolo ngolo na yina yonso ya ke kangisa nge nzila ya bisambu to ya bisakramento.

Bampangi batondama,

Na kulunsi Kristu ke songa na beto lutondo na yandi ya nene nene sambu na beto bantu ya masumu. Yandi ke kangula maboko na yandi na kuyamba bantu yonso: yo vanda bantu ya mbote to bantu ya mbi, bamiyibi to bandoki. Yonso yina sambu na kusonga na beto nde yandi ikele kugulusa beto yonso na lutondo na yandi, yandi ke vukisa bantu yonso ya ntoto mvimba na familia kaka mosi: Dibundu. Ye ntima na yandi ya dikongo kutobulaka ke songa beto inki mutindu konso muntu ikele na kifulu ya kieleka na kati; nde beto yonso kukota na kati sambu menga na yandi kusantisa beto ye masa ya ke basika na ntima na yandi kusukula beto.

Na kulunsi, Kristu ke longa beto na kulolula bampangi yonso ya lenda kusala na beto mbi. Beto ikele na nswa diaka ve ya kuvanda bonso bamimpani ya ke vutula ntangu yonso mbela na bampangi na bo. Yandi mosi me pesa mbandu na ngogo na yandi yai: “Tata, lolula bo sambu bo ke zaba ve inki ya bo ke sala”. Beto mpi, konso ntangu

ya mpangi kulenda kukota beto nsoki, beto kulemba ve na kulolula yandi, na kusamba sambu na yandi na mpila nde yandi kubalula ntima ye kutambula lugulusu ya Kristu.

Beto ta vukisa bisambu na beto kumosi ti Dibundu ya mvimba ya ke samba bubu sambu na bimbuka yonso ya ntoto mvimba nde konso muntu, konso kimvuka kusengumuna na kulunsi ya Kristu ya beto ata kuvumina kidimbu ya lugulusu na beto.

Beto na lomba yina yonso na nsadisa ya bisambu ya mama santa Maria ya me landa Yezu tii kuna Kalvari.

+José MOKO EKANGA

Pisekopo ya Idiofa